



武定府志  
(咸豐)  
二

武定府志卷之十

古蹟志 附塚墓

無棣在齊北隅昔景公登牛山北望齊曰美哉國  
乎鬱鬱綦綦由周以來凡前代舊城先賢故里今  
雖劍沒鐘沉金殘石泐而一二名勝或址基尙在  
或臺榭空存故老猶能道之卽鶴歸華表麟臥秋  
煙抑亦流風之未泯也識者鑒于興廢升沉俱足  
感發志意豈徒藉以代臥遊資憑弔已哉志古蹟

府屬

厭次故城

秦始皇東巡厭氣次舍於此因名其地漢置爲厭次縣今在陵縣名神頭鎮者西漢之厭次也東漢明帝更平原郡之富平縣爲厭次縣今在陽信縣東南三十里此東漢之厭次也晉厭次治馬嶺城元魏因之今在陽信縣東十里此晉及元魏之厭次也北齊廢隋復置唐貞觀中置棣州於厭次縣於是縣爲附郭隨州以遷一徙於陷棣州爲唐之厭次再徙於古城爲五代之厭次三徙於喬家莊爲宋元之厭次城內東察院本厭次故治中有史良臣縣廳題名記明制凡州不設附郭厭次省入

武定州名遂廢

按此一統志山東通志濟南府志悉載之說本採之劉氏繼先徵考爲最詳其唐迄宋元三徙之說詳後棣州故城下厭次雖古然旣爲附郭自當統於棣州蓋附郭則厭次無專城矣

棣州故城

州城凡三徙一在惠民縣東南四十里唐貞觀中置棣州於厭次縣城外周九里內惟一里土人謂內吐爲王府紫城蓋唐歷封其子爲棣王者四故西北有通天臺東南有鬪雞臺城南暨東距土河

各十二里唐太和二年大水壞棣州城五代時梁華溫琪爲棣州刺史徙新州以避河患世遂名故治爲陷棣州一在縣東南六十里卽溫琪所遷也城周九里南距大清河西暨北距土河各僅一里宋大中祥符八年河北轉運使李士衡奏徙之甫遷而大水沒故城丈餘一在湯信界之喬家莊卽士衡所徙也

劉氏繼先論陷棣州云唐文宗太和二年河大決壞棣州城此陷棣州之謂也舊傳宋祥符間城中先有鰲魚氣腥兼霖雨四旬有黑青氣如龍蟠北

城被柱礎而城陷又三皇廟碑唐武則天長壽元年  
年春地震屢次城陷求之史俱無之恐俗傳不足  
憑也按唐書諸王列傳封棣王者四人今尙有王  
府城址此足以徵矣又論古城云古城三面距河  
各僅一里陷棣州距河且十二里以避河患而方  
中處其滙蓋論地勢之高下不論河勢之遠近也  
卽今秋水時至觀之可識其故至宋而黃河之性  
尤悍雖今州再徙亦屢奏河患况古城乎迨自黃  
河入運河始免棣州之患

## 羊蘭城

一統志在惠民縣東南魏書地形志厭次縣註中有羊蘭城北史傳監眼傳父靈越文成拜青州刺史鎮羊蘭城宋乃以靈越叔父乾愛爲樂陵太守樂陵與羊蘭距河相對

### 蛤蜊城

一統志在惠民縣南有鹽池舊唐書李納傳棣州有蛤蜊鹽池歲出鹽數十萬斛

### 富平故城

在陽信縣東南三十里西漢置屬平原郡齊乘卽張安世子延壽徙封之邑陽信縣志光武建武五

年吳漢耿弇擊富平賊獲索於平原是也晉於縣置樂陵國太守邵續與段匹磾弟文鴛合兵攻石勒屯兵於此後皆爲石勒所殺故亦名邵城

按富平卽邵城各志並據是說今考元魏地形志樂陵郡陽信註有富平城邵續居之號邵城則非二城無疑何必兩見於冊省志載西漢富平明帝改爲厭次其故城在陵縣東北二十里相距甚遠不應在此豈張之故封本陳留之富平徙邑於此仍其故號歟今據劉氏說則在陵縣東北二十里者乃西漢之厭次非西漢之富平至東漢易富平

爲厭次而富平始爲故城則卽今地何相距之有  
漢書陳留並無富平而平原實有之不得因漢書  
國在陳留一語而遂謂陳留亦有富平也或曰其  
稱富平侯者古有遙封之例實未之國其子延壽  
辭讓徙封平原之富平至孫放始就國耳此說亦  
未足破國陳留而號富平之疑據漢書封張安世  
爲富平侯卒子嗣爵國在陳留別邑在魏郡則富  
平封號甚早所謂遙封者以其官於朝如周公不  
之魯太公不之齊並非國於此而號以彼也或曰  
平原郡富平縣之名殆因張之徙封而自以其封

之號名其地歟然皆不可考脩錄之以闕其疑必  
曲爲之說則鑿矣

### 陽信故城

〔一統志〕在陽信縣南漢置縣在今海豐縣界北齊  
移治馬嶺城隋時又移治於此唐置棣州治陽信  
元和志縣南至州六十里宋大中祥符七年棣州  
北徙於陽信界陽信因亦北徙今治寰宇記故城  
在無棣縣東南三十里齊乘在陽信西南七里俗  
呼城子務水經注屯氏別河東北逕陽信縣故城  
南是也今有截河鋪

按縣志西北有博昌千乘二城本之寰宇記省志謂千乘本在博興樂安之間於此何預而以千乘城繫之高苑縣博昌城繫之博興縣一統志亦然且謂劉宋移千乘之名於漢廣饒縣而於故千乘縣地僑置陽信縣屬樂陵郡魏書地形志陽信縣有千乘城是也此蓋因魏地形志樂陵郡陽信註有博昌千乘二城遂云城在今縣不知彼陽信乃劉宋於故千乘地僑置郡縣之名非二漢屬渤海郡之陽信則二城安得在此且今博興縣治卽劉宋僑置之樂陵故城也伏琛齊記千乘城在齊城

西北百五十里有南北二城相去二十餘里其一城縣治其一城太守治括地志千乘故城在高苑縣北二十五里一統志引此二說更爲了悉

### 馬嶺城

山東通志在陽信縣南欽風鎮之南商河故瀆所逕一統志在陽信縣東水經註馬嶺城在河曲之中東海王越斬汲桑於此魏書地形志厥次治馬嶺城齊乘馬嶺城在陽信縣東十里

### 雲城

濟南府志陽信縣志作瑗城在陽信縣東里許並

云若以博昌故城之陽信計之當五里一名連城  
王莽更名東順亭卽此

按一統志漢書王子侯表雲侯信齊孝王子元朔  
四年封水經注商河經富平故城北水側有雲城  
漢武帝封劉信爲侯國也寰宇記陽信縣有環城  
在縣東北五里一名連城蓋卽雲城之訛矣

### 信城

〔山東通志〕在海豐城北十七里相傳韓信下齊所  
築週圍六七里形如罄折而缺其西南今有信城  
里

無棣城

〔山東通志〕在海豐縣西北二十里五代周置保順軍宋移無棣縣治此元爲東無棣縣西無棣在直隸慶雲縣境內〔海豐縣志〕爲隋唐無棣舊縣覆蒲河經其西無棣溝逶其南週圍三里許

廣武城

〔一統志〕在海豐縣北八十里鬲津河東相傳漢初廣武君李左車所築故名今半爲河流浸沒海豐縣志俗傳後周及唐駐兵於此尙有囤糧及鐵冶遺蹟

龍且城

一統志在海豐縣北二十里地勢高峻形勝屹然  
海豐縣志與無棣城相對覆鬴河界其中較無棣  
城差小相傳爲龍且所據慶雲縣志作荻苴方輿  
紀要在縣東城下舊有荻苴河直抵海豐漢武帝  
封朝鮮降將韓陶爲荻苴侯疑邑於此

按漢書韓信東追齊王至高密楚使龍且距信夾  
濰水而陣一統志濰水自青州府諸城縣流入高  
密縣西南韓信與龍且夾陣者卽此水經注濰水  
北逕高密縣界據此可知俗傳之誤今高密縣西

南自有龍且城元和志楚將龍且所築齊乘在濰水東岸水西卽且冢冢南曰梁臺卽韓信囊沙壅水之地亦曰城隍城則與今地杳不相及似荻苴之說爲長但各志並稱龍且未敢徑斷故仍其名然非龍且所據無疑也

### 千童城

〔山東通志〕在海豐縣西南境寰宇記秦始皇遣徐福將童男女千人入海求蓬萊不死之藥築此城以居之漢置縣屬渤海郡水經注無棣溝東南逕千童縣故城東是也今樂陵有千童鄉亦故縣地